

NOTICIA DI
GOBIERNO

ISLA((•))NLINE

20
22

Diahuebs 21 Juli 2022

Email: IslaOnline@gobierno.aw Tel: 528-4952



Gabinete Wever - Croes II

2022

**AÑA DI INVERSION
Y OPORTUNIDAD**

2022
AÑA DI INVERSION
Y OPORTUNIDAD

**ARUBA MESTER
DI E ESFUERSO
DI NOS TUR PA
RECUPARA**

PROME MINISTER

Evelyn Wever-Croes



Gobierno di Aruba ainda ta den negosacion cu autoridadnan Venezolano **FRONTERA CU VENEZUELA NO POR HABRI**



Diahuebs 21 di juni, rumornan a cuminsa core na Aruba cu frontera lo wordo habri. Originalmente e informacion a sali for di medionan di comunicacion na Venezuela. Prome Minister Evelyn Wever-Croes ta enfatisa cu e noticia aki no ta corecto y ta informa cu Gobierno di Aruba ainda ta den negosacion cu autoridadnan Venezolano.

Prome Minister a accentua cu e negosacionnan ta bayendo bon pero no facil pa habri frontera sin mas pasobra esaki ta rekeri hopi diplomacia di ambos pais y palabracionnan concreto di

hopi medida di control mester wordo haci.

Prome Minsiter ta pidi tur ciudadano di nos pais, especialmente ciudadanonan Venezolano cu a haci di nos pais nan hogar, pa keda trankil y no kere noticianan cu no ta sali for di Gobierno di Aruba.

Gobierno di Aruba ta sigui cu e esfuersonan pa yega na un apertura di frontera na forma responsabel y controla, pero pa esaki mester di mas cooperacion di autoridadnan di Venezuela.



LOTTO PA DEPORTE TA BEK PA PAIS ARUBA

Cu e logro aki, Lotto pa Deporte ta sali gana. Nos hobennan deportista ta sali gana. Aruba ta sali gana.

Gabinete Wever-Croes II completo ta di acuerdo cu deporte mester haya prioridad na Aruba, apesar di e pandemia y crisis financiero. Cada hoben deportista ta un hoben menos riba caya. Cada hoben deportista ta un hoben cu ta bay haci cosnan grandi pa su pais.

Prome Minister

Evelyn Wever-Croes





Gabinete Wever-Croes ||

Lo paga bek e

5%

Danki pa a contribui y trece estabilidad na Aruba!



Gobierno di Aruba

Lo sigui traha pa progreso y bienestar
pa tur ciudadano.

| Aruba mester di **NOS** tur y **HUNTO** nos lo logra!



ARUBA A CUMPLI CU E CONDICIONNAN PONI PA CONSEHO DI MINISTER DI REINO

Gobierno ta paga 5% di recorte pasobra nos Pais tin cu bay bek na e normalidad



Na opinion di Gobierno, Pais Aruba a cumpli cu e 3 condicionnan pa paga bek e recorte di 5% na empleadonan publico, semi-publico y di fundacionnan asina Minister di Finansa a informa durante e conferencia di prensa extra-ordinario di Gobierno

di Aruba. Gobierno a presupuesta e pago den Presupuesto 2022, Parlamento a pasa e Ley di LNT y e salario di politico a keda corta cu 25%.

Gobierno di Aruba a haci tur locual ta na su alcance pa keda cla y haci e pago bek. Como Pais nos ta convenci cu nos a haci tur locual ta posibel pa cumpli cu Hulanda, pero na final si no tin oido pa esey, Gobierno di Aruba mester carga su responsabilidad propio segun Minister di Finansa Xiomara Maduro.

Despues di analisa e situacion Consejo di Minister a tuma e decision despues di a considera tur e puntonan menciona. No ta hustifica y desproporcional pa mas cu 5000 mama y tata di famia, nan entrada keda reduci den bista di e realidad. Gobierno a bay over na paga e 5% y den Presupuesto 2023 lo pone locual falta di e 12.6% pa wordo paga bek pasobra nos tin cu bay como Pais bek na normalidad segun e mandatario encarga cu Finansa Publico di nos Pais Aruba.

GOBIERNO DI ARUBA TA RESPETA E DERECHO CONSTITUCIONAL DI PARLAMENTO

Minister di Finansa a menciona den e conferencia di prensa cu Ministro Presidente a splica e situacion di Pais Aruba na Secretario di Estado, pero cu Hulanda no ta comparti e mesun opinion di Aruba y ta insisti pa cambia e ley di LNT bek na Parlamento. Gobierno di Aruba ta di opinion cu esaki ta contra di e principionan democratico di un pais.

Ademas den gobierno su bista e ley manera presenta y amenda

ta carga e principio di e ley. Na Aruba ta mas o menos 7 persona ta gana mas cu e suma den e ley y cu ley awo nan tin 5 aña pa adapta, locual ta un periodo rasonabel. Awo cu e ley a pasa, e trayecto a cuminsa tambe pa e personanan aki yega na locual ta poni den ley. Esaki ta haci cu tambe cu tin regla y no por tin abuso awo pa dilanti. Pa e motibo aki Gobierno di Aruba no por cumpli cu e peticion di Hulanda pa exigí of acerca Parlamento pa nan cambia locual nan a amenda.

Minister di Finansa Xiomara Maduro ta informa:

NO OBSTANTE DIFERENCIA DI OPINION CU POR TIN GOBIERNO TA ASUMI SU RESPONSABILIDAD PA CUMPLI CU E EMPLEADO PUBLICO DI ARUBA

E luna aki ta cuminsa paga e 5% pa e empleado publico por cobra 100% di nan salario bek



Minister President a anuncia for di Hulanda cu tin un diferencia di opinion entre Aruba y Hulanda riba e condicionnan pa paga e 5% bek pa e empleado publico por cobra 100% di nan salario. Despues di a delibera cu Consejo di Minister, a dicidi pa no obstante e diferencia di opinion cu por tin Gobierno ta asumi su responsabilidad pa cumpli cu e empleado publico y ta bay over pa paga e 5% manera a keda aproba den Presupuesto 2022.

ARUBA A CUMPLI CU E TRES CONDICIONNAN PA PAGA BEK

Gobierno di Aruba ta opinion cu Aruba ta cumpli cu e tres condicionnan poni pa Consejo di Minister di Reino pa Aruba por paga bek e 5% di recorte den salario di e empleado publico. E pago aki ta presupuesta den Presupuesto 2022 y gobierno di Aruba a muestra Caft con lo bay cubri esakinan, esta cual ta e fondonan cu ta destina pa por paga esaki y den opinion di gobierno esaki ta cubri. Ademá gobierno a presenta na Parlamento di Aruba, e proyecto di Ley di LNT conforme e palabracionnan haci cu Hulanda. Tambe a mantene e recorte di 25% di e salario di e Parlamentario- y Ministernan.

CAMBIO HACI DOOR DI PARLAMENTO TA LEGITIMO Y HUSTO

Pa locual ta e cambionan cu Parlamento a haci den e ley di LNT, Minister Maduro ta splica cu nan ta legitimo y husto. Parlamento den cuadro di nan autoridad a bin cu un amienda den esaki cual ta basa riba dos punto. E prome punto ta e periodo cu por reduci e salarionan di esnan cu ta gana mas cu e norma. Esaki a bira 5 aña en bes di 2 aña conforme e

consehonan di Raad van Advies y e Comision di Corporate Governance. Segun Minister Maduro, e cambionan aki ta wordo haci conforme e consehonan cu tin riba e ley aki. E di dos punto ta e suma di 130% di e salario di Minister President a ser adapta di 261 mil florin pa 329 mil florin, cual ta e suma sin recorte. Mirando cu e 261 mil florin tabata basa riba e salario di Minister President reduci cu 25 %. Minister di Finansa ta indica cu e recortenan 5% y 25% ta transitorio y no tabata e intencion pa esaki keda pa semper. Pa e motibo aki Gobierno a bay over na paga e 5% y den Presupuesto 2023 lo pone locual falta di e 12.6% pa wordo paga bek pasobra nos tin cu bay como Pais na normalidad. Parlamento na un manera husto a haci e cambionan aki, pasobra mester tuma como punto di salida e normalidad. Parlamento di su banda a splica riba e dos cambionan y Gobierno di su banda ta di opinion cu e cambionan haci pa Parlamento di Aruba, no ta mishi cu e principio di e ley. E ley a pasa na Parlamento, Gobernador a firma y awor Aruba tin un ley cu ta regula cu no tin salarionan hopi halto na Aruba.

GOBIERNO NO POR PARA RIBA DERECHO CONSTITUCIONAL DI PARLAMENTO

Minister Maduro ta splica cu Gobierno di Aruba tin cu respeta e derecho constitucional di Parlamento pa haci cambionan den ley. Esaki ta mesun derecho cu ta conta tambe pa otronan den Reino, manera Tweede Kamer cu tambe tin derecho pa haci cambio den leynan. Ningun hende ta para riba e derecho constitucional di nos Pais. Gobierno di Aruba no por cumpli cu Hulanda pa pidi Parlamento pa haci cambio na amienda cu Parlamento a haci den e ley di LNT. Gobierno simplemente no por para riba e derecho constitucional di Parlamento pa haci cambio na un ley via nan derecho di amienda.

GOBIERNO TA ASUMI SU RESPONSABILIDAD

Desde mei 2020, e aparato gubernamental, semi-publico y fundacion nan tabata solidario y a haci e sacrificio cu e recorte necesario di 12.6%. Gobierno di Aruba a bin ta haci tur locual ta na su alcance pa haci e pago di e 5% bek. Gobierno ta asumi su responsabilidad y ta tene cuenta cu e realidad cu tin un guerra na Ucrania cu tin su efecto pa Aruba tambe na unda costo di bida ta bira mas caro. E situacion aki ta pone cu e pago di 5% di e recorte na empleado publico, semi-publico y na fundacion nan ta hustifica.

2022
AÑA DI INVERSION
Y OPORTUNIDAD

**Y DUNA PRIORIDAD
NA SALUD Y
PROGRESO
DI CADA
CIUDADANO**

MINISTER

Dangui Oduber



MINISTER ODUBER TA MANDA FELICITACION NA E 28 EMPLEADONAN DI DIVI RESORT RIBA NAN ANIVERSARIO



Diaranson anochi a tuma lugar un ceremonia den e ballroom di Alhambra caminda a duna reconocimiento na 28 empleado di Divi Resort. Aki e Director General di Divi & Tamarijn Sr. Marin Bijl a haci e entrega na su empleadonan. E trahadornan aki a cumpli nan aniversario den e segundo cuartal di aña 2022. Minister Oduber no tabata por ta presente pero manera semper Ministerio di Turismo y Salud Publico tambe ta presenta nos plakaat pa asina duna nos trahadornan den hospitalidad nan reconocimiento mereci.

E 28 empleadonan aki ta traha den diferente area y diferente resort di Divi.

8 empleado a cumpli 5 aña di aniversario
3 empleado a cumpli 10 aña di aniversario

8 empleado a cumpli 15 aña di aniversario
1 empleado a cumpli 20 aña di aniversario
3 empleado a cumpli 25 aña di aniversario
2 empleado a cumpli 30 aña di aniversario
1 empleado a cumpli 35 aña di aniversario
2 empleado a cumpli 45 aña di aniversario

Un pabien sigur na sra. Emelinda Tromp y sr. Jorge Lugo cu ambos a cumpli 45 aña di Aniversario, esaki sigur ta di aplaudi. Emelinda a cuminsa traha Room Attendant den e compania na 6 di mei aña 1977, e tempo ey Emelinda tabata tin 17 aña di edad. Jorge a cuminsa su trayectoria na 24 di juni aña 1977 trahando como Houseman. Despues Jorge a traha como busboy, waiter, captain y desde 1989 como F&B supervisor.

Continuacion MINISTER ODUBER TA MANDA FELICITACION....

Divi Resort a habri su porta na Aruba den aña 1969 bou di e nomber Divi Aruba y awe tin 5 resort di Divi na Aruba. Hopi importante pa bisa ta cu 3 di e 5 resort nan aki ta di Timeshare. A keda demostra cu propietario nan di Timeshare ta cu Aruba den bon y den malo.

1. Divi Dutch Village Resort
2. Divi Aruba Phoenix Beach Resort
3. Divi Village Golf and Beach Resort
4. Divi Aruba All Inclusive Resort
5. Divi Tamarijn All inclusive Resort

Minister Dangui Oduber ta manda palabranan di felicitacion y aprecio na tur e empleadonan di Divi Resort. Cada un di bosonan ta contrubui grandemente cu e sector turistico, brindando servicionan di calidad na nos bishitantenan. Minister Oduber ta bay sigui brinda e tipo di reconocimentonan aki na nos embahadornan turistico, paso nan ta e weso di lomba di e industria importante aki.

Turismo ta nos unico pilar economico y ta e driver di nos economia.



2022
AÑA DI INVERSION
Y OPORTUNIDAD

**BRINDANDO E
SIGURIDAD PA
UN MIHO
SOCIEDAD**

MINISTER
Rocco Tjon



A REUNI CU PERSONAL DI SPD PA ASINA AMPLIA RIBA E DESAROYONAN CU TIN ANDANDO DEN CUADRO DI SALUD MENTAL Y ADICCION

Algun tempo atras Minister di Husticia y Asuntonan Social Rocco Tjon a bishita SPD, y ayera a invita e personal di SPD pa un reunion special, caminda a brinda un splicacion amplio di tur e desaroyonan cu tin andando riba e tematica di salud mental y adiccion.

Ta asina cu hopi bes ora ta papia di salud mental y adiccion ta pensa solamente riba respaldo, sinembargo, SPD ta hopi crucial pa cu e tematica aki tambe. A toca e tema di con ta bay surpasa e retonan den e tereno aki, a splicanan tocante e proyecto di “stichting hunto” y con esaki ta hinca den otro, cual lo consisti di un departmanto specifico pa atende cu e tematicanan aki pa mucha y hobennan. Banda di esaki, a papia tambe di e “building blocks”, pues e werkgroepen cu tin actualmente, cual ta trahando hunto pa concretisa e vision cu Aruba tin a largo plaso hunto cu PAHO.

Banda di esaki a toca tambe e parti legislativo, e parti di enseñansa, infraestructura, material, y financiamiento. Pues un reunion sumamente positivo, caminda e personal mes a indica cu nan tambe ta wak e desaroyonan aki como uno positivo y a trece ideanan padilanti pa e parti di tecnologia manera software programs, cual ta algo hopi importante y un idea cu sigur lo conta cu atencion di Ministerio di Husticia y Asuntonan Social. Manera a bin ta menciona for di inicio, e personal ta para central den cada departamento, y pa e motibo aki, e ta importante tambe pa personal ta bon informa y involucra den dicho desaroyonan, y pa e motibo aki tambe nan ta forma parti di e stuurgroep GGZ.





MINISTER ENDY CROES A REUNI CU GRUPO DI DOCENTE CU A BIAHA PA FINLANDIA



Recientemente Minister Endy Croes tabatin un encuentro informativo cu un delegacion di docentenan di Aruba cu a biaha april ultimo pa Finlandia. Un total di diescuatro docente di tres diferente scol primario na Aruba a participa den e proyecto aki cu ta wordo financia pa Erasmus Plus. Presente na e atardi ameno tabata coordinador di e proyecto di Erasmus Plus sra. Monique Breinburg, coordinador di Pius X School, sra. Saskia Maclean, cabesante di St. Dominicus sra. Caroline Cardose, sra. Emilaine Giel di Erasmus Plus alabes coordinador St. Dominicus College y sra. Zulaika Flanegin di Erasmus Plus y coordinador di St. Franciscus. Meta di e reunion ta pa informa e mandatario di Enseñansa di e sistema di educacion na Finlandia como tambe pa comparti nan experencia. E docentenan a bishita diferente scol na Finlandia pa mira con Enseñansa ta wordo organisa. Finlandia ta un di e miho pais na mundo riba den e tereno di Enseñansa. Finlandia ta un di e paisnan na mundo cu mas ta inverti den Enseñansa. Na aña 2021 Finlandia a inverti 7% di nan GDP den Enseñansa. Cada diez aña Finlandia ta cambia e curriculum. Educacion basico ta completamente gratis.

Durante e reunion e docentenan duna un presentacion na e mandatario di Enseñansa di loke cu nan a experencia algun ehempel: e klasnan nan Finlandia ta consisti di un averahe di 24 estudiante di tur nivel, cada estudiante ta haya e stof cu ta coresponde (adaptief onderwijs).

Tin un 'asistent' den cada klas pa asisti e docente cu e



alumnonan. E estudiante ta traha segun su tempo y ta duna espacio pa cu esaki. Cada 'les uur' ta 60 minuut di cual 45 minuut e alumnonan ta haya les y despues esaki ta sigui pa 15 minuut pauze na unda cu e estudiante por bay pafo pa hunga of hunga den e 'breakout room'. Scol primario tin un duracion di 9 aña y e ta cuminsa na edad di 7 te cu 16 aña. Muchanan bou 7 aña no ta obliga pa bay scol, no tin 'leerplicht'. Si e mayor ta desea por manda nan yiu un scol preparatorio.

Concluyendo Minister Endy Croes ta gradici e docentenan pe presentacion como tambe pa comparti nan experencia. E mandatario a sigui bisa cu e ta un bunita proyecto y kere cu Aruba mester profundisa mas den e materia aki. Enseñansa ta e yabi pa futuro.

DESPUES DI TEMPESTAD,
LAMA TA BIRA CALMO ATROBE.
ESAKI TA OPORTUNIDAD PA NABEGA Y RECUPERA.
CU BISTA RIBA E HORIZONTE INSIGUR,
PERO CONSCIENTE CU NOS LO SURPASA ATROBE,
TUR RETO NOS DILANTI COMO UN SOCIEDAD UNI.
MANTENE CALMO Y UZA TUR MAL TEMPO
COMO UN OPORTUNIDAD PA SIÑA Y INNOVA
Y CONBIRTI E CRISIS CU NOS A PASA ADEN,
DEN SPERANSA Y POSIBILIDAD NOBO PA NOS TUR.



Feliz diahuebs!



**20
22** | AÑA DI
INVERSION Y
OPORTUNIDAD